

**Date – 24/05/2026**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. Lunglei leh Hauruang inkara lirthei chesualah mi 3 an thi.
2. Union Minister Pu Rajiv Ranjan Singh a hovin naktuk hian Aizawlah “Regional Review Meeting: Northeastern Region 2026” neih a ni dawn.
3. Vawiin (Pathianni) hi Pentikos Ni a ni a, khawvel hmundanga Kristiante rualin Mizorama kohhran hrang hrang te pawhin urhsun takin an hmang.
4. Sorkar laipui chuan Ebola hri lenna, Democratic Republic of Congo, Uganda leh South Sudan ramah zin rih lo turin India mite a ngen.



**MISHAP**

Lunglei leh Hauruang inkar, Riangvaite thlanmual pelh hlek, National Highway 302-ah vawiin tlai khan lirthei chetsual avangin mi 3 an thi.

Suzuki i10 Car chetsualna-ah hian car neitu Jerry Lalnunfela (41) 2nd Bn MAP leh Tv. Lalhlimpuia (25) Hauruang khua ve ve leh hmeichhe pakhat an thi a, hmeichhia tunge anih tih an la finfiah lo niin Lunglei a kan Corr chuan a sawi. Hauruang atanga thudawn danin, Jerry Lalnunfela leh Lalhlimpuia te chu nizana an leng chhuak an haw loh avangin, vawiin khan an chanchin a rugin ngaihven a ni a. Hetianga beng an chhit lai hian, Lunglei leh Hauruang inkar, Riangvaite thlanmual hnaihah lirthei chesual a awm tih hria-in an ngaihven a., mi tlawmngaiten chhui nghal in ruang pathum hi an hmu ta a ni. Nizan zanreh tawh tak a chetsualna hi thleng niin a lang a, ruang lak chhuah hna hi mi tlawmngai te’n an thawk mek a ni.

Chanchin buatsaih lai hian midang chuang an awm em tih hriat a la ni lova a ni a, thudawn pakhat chuan an 3 chiah a chuang an nih an rin thu a sawi. Car hi a lum thui hle niin an sawi ani.



## PROTEST

MZP chuan Tourism department Director atana Pi R. Lalrodingi ruat nawn leh a nih duh loh lantir na'n Tourism department hnathawkte pisa kai tur,naktuk atangin dan an tum.

MZP general headquarters hian nimin tlai khan inhmukkhawm hmanhmawh kovin Zirtawpni-a Mizoram sorkarin Tourism Director charge la tura Pi R Lalrodingi a ruatna order chhuah nawn chungchang a ngaihtuah a. Thuchhuah siamin hemi chungchang hmalakna kal zelah hian,naktuk Thawhtanni hian Mizoram Tourism Pisa kai tur dan nise an ti ani. Sorkar thuchhuah hi Mizoram mipuite leh zirlaite zah lohnaah an ngaih thu leh thuchhuah hi sut a nih hma chuan na takin a dodal zel dawn niin an tarlang. He thilah hian MZP chuan, mipuite thlawpna an ngen thu leh Pisa kai tur dannaah hian, thalai hna zawng mek leh zirlaite tawiawmna an ngen nghal tih an sawi bawk a ni.

He tih lai hian Health Minister Pi Lalrinpuii chuan Pi Lalrodingi service hi an mamawh ngawih ngawih avanga ruai nawn an nih thu a sawi a. Tourism changa North Eastern Council (NEC) a lo awm tawh, hnathawhna tur sum pawh chhuah tur hre em em a ni a ti a. Tourism a chan lai khan nasa takin a tanpui ni a sawiin, tuna Tourism Minister Pu Lalnghinglova Hmar pawh a pui nasa hle niin a sawi bawk.

Pi Lalrinpuii hian,he thu hi Lunglei HPC Office-a HPC Vice Chairman Pu V. Malsawmtluanga'n Women Icon Award 2026 a lak a lawmsakna-ah a sawi a. He hunah hian Lunglei a pawl hrang hrang - MUP, Sub. Hqtrs. YMA, MZP, MSU leh MJA te sawm an nih angin an tel a. Pi Lalrinpuii chuan Pi Rodingi hi a pension khan anmahni Directorate atang khan tumah Director la kai phak an awm si lova, churang chuan a remchang thei ang ber tur ngaihtuah in cheng 35,000/- lek hlawh turin la chelh rih sela. Tourism ah hian hmalakna tur tam tak, ama hriatpui leh amah in a lo tih avanga hlawhtlinnate a awm avangin amah hian chelh leh se tih hi sorkar duhdan a ni, a ti a. Hei hi MZP te pawh in lo hria sela a duh thu a sawi a ni.

Pi R. Lalrodingi hi mipui hmakhua ngaih vang a ni tih sawiin Health Minister chuan Pi Rodingi hian a hlawh hi chutiang tehchiam a a thlakhlehna tur a awm lo niin a sawi bawk a. A pension hlawh a la ang a, OSD kha a la ni thei reng a, Co-Terminus in amah chuan nihna sang tak chelh mah se la, Tourism director hna a chelh hian Tourism lamah hlawkna a awm dawn avanga Sorkar hian ruai hram hram an ni tih hi hriatpui a duh thu a sawi.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## PENTECOST DAY

Vawiin (Pathianni) hi Pentikos Ni a ni a, khawvel hmundanga Kristiante rualin Mizorama kohhran hrang hrang te pawhin urhsun takin an hmang.

Presbyterian Kohhranah chuan, thupui inang tlang hmangin thuchah ngaihthlak a ni. Chawhma Inkhawmah Thupui atan "Isua hnenah an awm tawh tih an hre ta a" tih hmangin thuchah ngaihthlak a ni a, Chawhnu inkhawm thupui atan "Thlarau tivui suh u" tih niin zan inkhawm thupui chu "Rum sawi hleih theih lohvin min tawngtaisak thin" tih a ni thung. Zan inkhawmah hian Presbyterian Church of India General Assembly pualin tawngtai rual a ni ang a, zan inkhawm thawhlawm pawh PCI General Assembly pual tur a ni ang a, thawhlawm lakkhawm te hi pastor bial tangka-vawngtu kaltlangin Synod Office-ah thehluh tur a ni.

Catholic Kohhran te pawhin vawiin Pathian Thlarau thianghlim lo thlenna ni Penticost Pathianni chu urhsun tak in an hmang a. Mass thianghlim rualin Eucharist Sacrament buatsaih a ni a. Puithiamte'n thupui thlan bik hmangin Pathian thuchah an sawi baw. Mizoram a Catholic Biakin pui, Christ the King Cathedral, Kulikawnah chuan Baptisma chang an awm bakah, Mass inthawina huna Puithiam rawngbawl na a pui tu tur Altar Servers, naupang 69 te lakluhna leh malsawmna hun hman a ni baw.

Salvation Army chuan chhunah Thianghlimna inkhawm hmangin zaninah Chhandamna Inkhawmah an hmang ang a, thupui thlan sa, "Thlarauva khatin awm zawk rawh u" tih an ngaithla a ni. United Pentecostal Church of North East India (UPC-NEI) chuan Pentikos hi chawhma, chawhnu leh zanah an hmang a. Thupui thlan bik a awm lova, kohhran hruaituten kohhran hrang hrangah an hmanpui a, kohhran thenkhat chuan thingpui leh ruai nen Pentikos hi an hmang a ni.

Pentikos hi Grik tawng a ni a, 'Sawmngana' tihna a ni a. Thuthlung Hlui-ah chuan Kalhlen Kut tiak ni atanga ni sawmngana-ah an hmang thin a, Thuthlung Thar hunah erawh chuan Isua Thawhlehi tuk (Easter) atanga ni 50-na-ah hman a ni.



## TRAVEL RESTRICTIONS

Africa ram thenkhata Ebola hri leng mek vangin Sorkar laipui chuan India mite chu Democratic Republic of Congo, Uganda leh South Sudan ramah zin rih lo turin a ngen a, heng rama cheng mek India khua leh tuite pawh hri leng khuahkhirh tura thuneituten inkaihhraina an siamte, thuawih taka zawm turin a ngen baw.

Hetih lai hian India-ah Ebola hri kai an la awmlo tih Health & Family Welfare Ministry chuan a sawi a, India chuan vawiin khan hri lenna rama hman tur damdawi leh hmanraw pawimawh chi hrang hrang, Africa Centres for Disease Control & Prevention hnenah a thawn a ni.

Ebola hi thihpui awlsam tak natna hri a ni a, a hri hi boruaka leng ni lovin mihring atanga mihring veka inkaichhawn theih natna a ni.



## EXPLOSION IN PAKISTAN

Pakistan Balochistan province-a vawiina rel kawnga thil chak tak puakah mi 24 an thi a, midang engemawzatin hliam an tuar bawk.

He thil hi province khawpui, Quetta-a Chaman Phatak rel station bula thleng a ni a, rel pakhat bakah station bula lirthei ding lai 10 a nghawr chhe nual a ni.



## CHINA COAL MINE BLAST

China ramchhung hmar lam, Shanxi province-a Liushenyu lungalhthei khur puakah mi 82 an thi a, mi 2 chin hriat lohvin an la awm mek bawk.

Vanduinna hi Zirtawpni-a thleng a ni a, a puah lai hian hnathawktu 247 an awm a ni. Khur puah chhan hi hriat la ni lo mahse carbon mon-oxide tam lutuk vang anih rin a ni.

Prime Minister Narendra Modi-a chuan China rama chhiatna thleng chu pawu a tih thu sawiin social media-ah tarlangin thi chungte hnenah tawrhpuina a hlan a ni.

